

太上洞玄靈寶天尊說大通經

真空章

先天而生生而無形後天而存存而無體然
而無體未嘗存也故曰不可思議

玄理章

靜為之性心在其中矣動為之心性在其中
矣心生性滅心滅性現如空無相湛然圓滿

玄妙章

大道無象故內攝於有真性無為故外不生
其心如如自然廣無邊際對境忘境不沉六
賊之魔居塵出塵不落萬緣之化致靜不動
致和不遷慧照十方虛變無為

偈曰

有法悟無法 無修解有修 包含萬象體
不呈一絲頭

太上洞玄靈寶天尊說大通經

太上洞玄靈寶護諸童子經

道言天地父母日月五星運炁自然凡人居
世命屬北斗七星三台輔弼華蓋本命星官
元辰真君二十八宿南斗北斗東斗西斗衆
星官屬天地水三官河姑織女天河星衆一
切神仙世間男女立身濁世出入門戶衝突
天狗天河惡星醜宿致有刑剋三煞六害禍
累相仍豈知趣向若能虔心祝誦降福流恩
使諸男女或求嗣胤或保長年普謝衆靈皆
如是願身中七傷六害胎娠元辰應是逆災
可倚十方諸善童子重賜威光為除厄難保
壽延生
道言道能生成道能育養七神童子者是中
天北斗七星之精炁也凡人陰在胎中七月
之時下降人身開明九竅記於姓名便屬管
條一曰天蓬二曰天內三曰天衝四曰天輔
五曰天禽六曰天心七月天柱
道言諸善童子各乘飛雲七明之車五練之
衣從十方神仙兵馬七億萬衆常在人間分
身變化或長或短或男或女執符把籙檢校

罪福善惡因緣男女年命長短人能知之不
死長生若諸世俗夫妻男女命隔星河身居
樓閣或男女有隔越之難橋梁不通滯在三
十六星河之畔夕被天狗所隔曉為地狗所
越眷屬咨嗟憂傷無路但當虔懇燒香轉經
謹請七元真炁童子流恩降福為度災厄放
赦男子女人得過星河孤神不犯於孩童河
母無侵於幼稚男女成立身命延長南斗添
益算之符北斗落死籍之字父母安泰各保
吉昌一請東方九炁天中九神童子為諸男
女度脫春三月所有疾病三刑四殺七傷八
難河神侵撓之厄悉令消散二請南方三炁
天中三神童子為諸男女度脫夏三月所有
疾病三刑四殺七傷八難河神侵撓之厄悉
令消散三請西方七炁天中七神童子為諸
男女度脫秋三月所有疾病三刑四殺七傷
八難河神侵撓之厄悉令消散四請北方五
炁天中五神童子為諸男女度脫冬三月所
有疾病三刑四殺七傷八難河神侵撓之厄
悉令消散五請中央一炁天中一神童子為